

योग—सुधा



रवि शास्त्री, इलाहाबाद, यल

स्व० योगवीर सिंह

नेपालभाषा सफू गू १ गू

योग—सुधा

(स्वर्गीय कवि योगवीरसिंया अमर कृति)

मुंहा

चित्तधर “हृदय”

प्रकाशक

नेपालभाषा परिषद्

३६१, न्यत तुंछे, कान्तिपुर १३

ब्याक्क अधिकार प्रकाशकया

नेपाल संवत् १०९८

स्वक्वः खुसी १०००

सु ४/-

याकि

पद्मा प्रिन्टसे, येँ ।

पिकाःपाखें

स्वक्वः खुसी

की नेपालभाषा परिषद् दकले ह्लापां
पिकायगु थ्व सफू थथे स्वक्वः खुशि पिकाय्
दुगु की स्वर्गीय कवि योगवीरसिया कृति कीत
अति यः धयागुया प्रमाण खः । आःला कन
थ्व योग-सुधा सफु बी. ए. या पाठयक्रमय्
नं थ्यानाच्चंगुलि अप्पो पठन-पाठन जुइगु
स्वाभाविक । थथे हे मेमेगु सफू नं निगू स्वंगू
संस्करण जुइकेगु छिकपिनिगु ह्लाःती ।

- पिकाक

धलःपौ

पु	कविता	पौ	पु	कविता	पौ
१	नेपाल भाषा	१	१६	बुद्ध गन बु	५१
२	अहिंसा	२	१७	चैत्य वन्दना	५१
३	धर्मसार	३	१८	सिन्हाज्याया ब्वी	५२
४	धर्मोद्धार	७	१९	खेद	५२
५	महामञ्जुश्री	१२	२०	प्रेमिका चरित्र	५३
६	हे अजिमा	१७	२१	हे देवि	५३
७	रानी मन्दिराया विलाप	१८	२२	धम्मपद (यमक वग्ग)	५४
८	मृत्यु	२७	२३	प्रवासी पत्नीया बसन्त	६०
९	कीर्तिया लें	३२	२४	शान्तिसंगीत	६८
१०	सार वचन	३३	२५	जीवन हार	७१
११	मनया उद्गार	३४	२६	फवसा	७१
१२	गीत	३६	२७	हृदयया सली	७१
१३	श्री भगवान निर्वाण	४३	२८	विश्वन्तद	७२
१४	धम्मपद	५०	२९	चैतन्य गुरु अष्टक	७३
१५	विहार	५०			

योग-सुधा



नेपाल भाषा

(बुद्धधर्म व नेपालभाषा पत्रिका ने. सं. १०४७)

प्रेम तोता मातृ भाषाया नेम गननं ओइगु ॥ध्रु॥
देश भाषा तोलताबो मेव भाषा काः वन ॥
सुख तोता दुख मालिह्य मूर्ख सरिवरि जू वन ॥१॥
उन्नतीशील जनपीं गुलि दु थो सन्सारसं ॥
फुक्कसीनं थवगु भाषा प्रम यान्ता तल देशसं ॥२॥
भाष थवगु उच्च जूसा दुःख गबलें वइ मखु ॥
भाष थवगु मान्त धासा सुःख गबलें जुइ मखु ॥३॥
नेपालभाषा जीर्ण जूगु अलसि मचासे भीके नू ॥
भारतीय शास्त्रभवनं मान थ्वैत वीके नू ॥४॥



अहिंसा

(बुद्धधर्म व नेपालभाषा पत्रिकां ने. सं. १०४७)

मय्ल प्रियजन मांस नयगू कोटि बिनतो तोतेनू ॥धु॥
मेवयागू प्राण मकासे मांस कीत दैमखू
सीक सीकं नरक वनिगू कार्य्य कीसं याय्मखू ॥१॥
मांस नयगू लोभ दतले पाप गबलें फुइ मखू
पापयागू शेष दतले, मुक्ति गबलें जुइ मखू ॥२॥
अन्न फल मूल नयत व्यूगू कीत प्रभुनं यक्व दु
मांस नयत आज्ञा व्यूगू शास्त्र साक्षी छूं मदु ॥३॥
भ्रान्ति थुगु खेँ जूगू दःसा शृष्टियागू नेम सो
पाचुपे चोगू दन्त लूसि हे सत्य साछी कीगू सो ॥४॥
व्याघ्र श्वान जन्तुपीत मांस नयत माःगूलीं
देयका व्यूगू च्चामुसे चोक दन्त पंक्ती सो लुसी ॥५॥

धर्मसार

(बुद्धधर्म ब नेपालभाषा पत्रिकां ने. सं. १०४७)

सन्सार सागर बिचे गुलि प्राणिपींदु
ओ प्राणिपीं फुक सिबे नर जाति झांदु,
दैगु मखू हतपतं नर जन्म घैगु
संसार चा हितु हिला जक जन्म ज्वीगु ॥१॥

हे हे सखे ! सकसिनं थुगु तत्त्व सीका
याय्गु स्व धर्म मननं फुक जाल सीका,
कीटादि प्राणि सकलें सम भाब भापी,
शत्रू थ्व मित्र घडगु अभिमान तोती ॥२॥
चेतन्य देह दत सो अनमोल कीत
मेमेगु देहस मद थुलि शुद्ध चेत
सीका खुत्ती नरजनं शुभ धर्म याय्गु,
औसर्दैई मखु लिपा भव पार ज्वीगु ॥३॥

धर्मादि कर्म थुगु हे जनमे मयाहा
नाना अनित्य बिषये सुख भोग याहा
चाचा उला षडगत्ती दुख भोग यायी,
सुखाबती बनि मखू नरके ब लायी ॥४॥

प्राचीन सार्विक कथा जुल लोप कीगु,
लोके प्रचार जुल तामस धर्म न्हूगु,
निर्वाण पद्वि दइगू जूल बुद्धधर्म,
सीका जनं थुगु खँया असि गुह्य मर्म ॥५॥

श्रीशक्यसिंह मुनिनं उपदेश व्यूगू
सम्पूर्ण लोक सहजं भव पार ज्वीगू,
माता पिता सम खने फुक प्राणीपित
तोता दशाकुशल पाप मनं तुरन्त ॥ ६॥

नाना प्रकार छलन धन हणं यायेगु,
याना प्रहार वलनं पर प्राण कायेगु,
वेश्या व नर्त्ति परया गमनादि यायेगू
स्वंगू थ्व पाप करमेन्द्रियनं सनीगू ॥७॥

मिथ्या खँ ल्लाय्गु हनं परदोष वीगू,
दाम्पत्य मित्र मिलये जुववित फाय्गू,
चुपी समान वचनं परयात स्वीगू,
येंगू थ्व पाप नरया म्हुतुनं हईगू ॥८॥

कक्यागु उन्नति खना सहयाय् मफैगू,
आषद् खनी यदि सुयां सन हर्ष ज्वीगू
श्री बुद्धशास्त्र मननं उपहास याय्गू,
स्वंगू थ्व पाप सहितं दशपाप धाःगू ॥९॥

भिक्षू गुरू थवहा मां अबुयात स्याय्गू,
चैत्यादि देव जिनया गृह व्वंस याय्गू,

शास्त्रे कना तल भयानक वाप धाःगु,
 न्यागू थ्व पाप मनुखं गवलें मयाय्गू ॥१०॥
 नेत्रादि ईन्द्रियपिसं मनयात स्यंका
 क्यंका तई विषयया दृढ जाल देका,
 सीक्का थमं विषयया विष नेगु तोती,
 चंचल् जुया वनिगु मन् थवगू वशे ती ॥११॥
 याय्गू थमं जप तपादिक धर्म कीर्ती
 प्राणी गुली दत उलि फुकसीगु नीती,
 थोहे मती जक तया शुभ कर्म याय्गु,
 ईच्छा मयाय्गु उकिया फने थःत काय्गु ॥१२॥
 थो पुण्य बीज जगते फिजये जुईगु
 वृक्ष जुया फल उकी अनगिन्ति सैगु,
 वंगू हनं सुरुरुं फल फुकक थः के,
 होला विया हररर परयात जोके ॥१३॥
 शृष्टीं निसें थउँ तकं पशु पक्षि कीटः
 बीया तत तिनि अहो! बहु जन्म खीः,
 जन्मे पतीं छद्दा छद्दा जुल मां अबूपीं
 सत्सारवासि सकलें फुक प्राणि धाःपीं ॥१४॥
 मेमेगु जन्मस थुली सुविचार याय्गु
 शक्ती दुगू मखु सुयां भव प्राणितेगू
 सेवा उकीं इमिगु आ बति याय माःगू
 स्वंगू थ्व ज्ञान मननं पित छ्वे मज्यूगू ॥१५॥

तोताव पाप सङ्गतां मन काय वाकं
यायू मखू विषयया रस भोग मोकं,
तंता फुका जगतया निरबाण लाय्सा
त्रिरत्नया शत्रण हूँ मन शान्ति याय्सा ॥१६॥

सर्वार्थसिद्ध सजनं अधिराज तोता
ल्लानाव ज्ञान थुगु हे जनयात सःता
याना बिज्यात थमन तप चर्ज्य घोर,
कालांतरे जुल महा प्रभु योगबीर ॥१७॥

धर्मोद्धार

(बुद्धधर्म व नेपालभाषा पत्रिकां ने. सं. १०४७)

ह्लापां अशान्ती फुक ध्वंस याःह्य
शान्ती सुधाया जल वृष्टि याःह्य
श्रीशाक्यसींह प्रबल प्रताप
प्रेम स्थितीया गुरु वैत भाःपी ॥१॥

आनन्द आदी प्रिय शिष्य मुंका
न्यंका विज्यागू जिन धम्म भिका
गीयूष धारा सम पथ्य शिक्षा
निर्वाण दैगू अनमोल दीक्षा ॥२॥

थो बोधि मार्गे फुक शान्ति शान्ति
गब्लें मज्जीगू वनिपीत भ्रान्ति।
समाधि आदी थुकियागु नेम
तप्यंक छ्वैगू अकनिष्ठ धाम ॥३॥

उत्कृष्ट विद्या जुल बोधि ज्ञान
विद्वान वर्ग बिल थ्वीत मान,
था पन्थ गामी नर नारिणीन्त
बाधक् मद्दुं निरबाण ज्वीत ॥४॥

आदि प्रभूनं थुगु तत्त्व त्वीका
याना विज्यागू भवजाल चीका
अनेक जन्मे अति याःगु कष्ट
पुराण आनं दनि ओ दुरुस्त ॥५॥

स्वयं प्रभूनं थुगु कर्म याःगू
संपूर्ण ज्वीआं भगवान धाःगू
किनं सरासर् थुगु धर्म याय्नु
निर्वाण मार्गे लिमसोस्य ब्वाय्नु ॥६॥

रागादि षट् शत्रु परास्त यायेगू,
षट्पारमीतां पुरये जुयेगु,
धारण् चतुर्ब्रह्मविहार याय्गु,
थो बोधि ज्ञान्या पथ देक तःगु ॥७॥

मैत्री करुणा मुदिता उपेक्षा
क्षान्ती व विर्य शिल ध्यान प्रज्ञा
खुगू जुई दान छगू सहीतं
थो पूर्ण याय्गू दशवल् जुयेत ॥८॥

शास्त्रादि ज्ञानं वचनादि मानस्
धनं शरीरं यदि प्राण दानं
मेपीं सुखीयात सहाय वीगू
मैत्री धकासो थुकियात धाःगू ॥९॥

दुखी सुखी रोगि धनी गरीव,
धर्मी अधर्मी पशु आदि जीव,

यायू दया स्नेह थ्व प्राणिपान्न,
धाःगू मुनीनं 'करुणा' थ्वयात ॥१०॥

प्राणीपिनोगू सुख शान्ति धाम
पुण्यादि कर्म शुभ ख्याति नाम
जूगू खनेओ मन हषं यायू
थो अर्थ सीकी "मुदिता" धयागू ॥११॥

हिंसादि हिंस्रक पशुयागु धर्मे
नर्के वनीगू नरयागु कर्मे
स्वेगू मयायू रति मात्र इच्छा,
लोके थ्वयागू जुल नां 'उपेक्षा' ॥१२॥

अन्याय रूपं धन कीगु काह्य
चूपी ज्वना छेदन यायू ओह्य
शत्रू ब जूसां प्रतिकार मयायू
क्षमा तयेगू जुल क्षान्ति धाःगू ॥१३॥

विद्या व धर्मे पर हीत कर्मे
निर्भीक रूपं नरयागु जन्मे
यायू पराक्रम थन वीर आर्य्य,
वीर्य्य धयागू थुगु वीर कार्थ्य ॥१४॥

राजा प्रजा रङ्क फकीर जनी
थो फुक्कसीतं प्रिय ज्वोगु वाणा
ह्लाना सदानं सुखि मात्र यायू
कठोर बाणीं दुखि सू मयायू ॥१५॥

दुःखादि शोके मुखयागु कान्ति
मलीन् मयाय्गू इति मात्र ज्योति
सत्ये व धर्मे दृढ भक्ति याय्गू
स्वभावा भीमू जुल शील धाःगु ॥१६॥

नःसां व तोंसां गृह कार्य याःसां
दंसां व दंसां परदेश ओंसां
मतीं सदानं प्रभु ध्यान याय्गू
तोते मज्यू सो थूगु "ध्यान" धाःगू ॥१७॥

आकाश भूमी जल वायु अग्नि
वनस्पती खेचर आदि प्राणि
गनं थ्व ओगु गवले स्यनीगू
कीत थ्व हे निश्चय ज्ञान माःगू ॥१८॥

पृथ्वी सहीतं फुक पञ्चतत्त्व
चैतन्य रूपी जग व्यापि सत्त्व
दुगू मखू छुं फुक शून्य शून्य,
"प्रज्ञा" ह्यस्यूसा जुल धन्य धन्य ॥१९॥

रत्नादि आभूषण वस्त्र दःसां
पुत्रादि पत्नी प्रिय देह जूसां
थःके दुगू याचकपीन्त योगू
निस्वार्थ भावं फुक दान बीगू ॥२०॥

राजा विश्वन्तर्मणिचूडयागू
सोसो प्रियेपीं इतिहास कीगू,

व्यूगू दुखीपीत अगम्य दान
 पुत्रादि पत्नी शिरयागु रत्न ॥२१॥
 अनेक की पूर्वजपीं सुधीर
 जूया बने धुंकल दानवीर,
 ओ वीरया सन्तति की जुयानं
 सुबुद्धि कीगू नल सो अज्ञानं ॥२२॥
 थो बुद्ध धर्मो फुत कर्म योगी,
 बाकी दनी केवल अर्थ भोगी,
 धिक्कार ! कीगू नरयागु काय,
 छू सार भीगू दनि हाय हाय !! ॥२३॥
 हे आर्य शान्तीकर ! वन्द्युदत्त !
 हे शौर्य शाली गुरु सुर्तवज्र !
 अज्ञान भूतं बिल जिम्त पीर
 विज्याहुँ याय्तः थन धर्म स्थीर ॥२४॥

महामञ्जुश्री

(बुद्धधर्म व नेपालभाषा पत्रिकां ने. सं. १०४८)

मञ्जुश्री छलपोलया चरणसं साष्टाङ्ग याना अती
प्राचीन्या इतिहास याय वरणन् नेपालयागू भती,
नेपाले भगवान् स्वयम्भु दु धका श्रीमञ्जुनाथं सिया
याये दर्शन धैगु वीर हृदये उत्पन्न इच्छा जुया ॥१॥

बिज्यागू गगनं विमानस ज्वना त्रैतायुगे चीननं
याःगु वास वहे सिरीगिरी बिचे मेयाय् मनोम्य गनं,
धर्मस्थापन याय धैगु मननं नेपाल मध्ये सहर
देकाओ विल मञ्जुपत्तन धका धन्य प्रभूया लहर ॥२॥

क्षत्रि ब्राह्मण वैश्य शुद्र सद्भितं सुंका अनेपीं गुणी
थोहे गूँस बिज्यागु सत्य युगसं श्रीश्री विपश्ची मुनि,
पुण्यक्षेत्र लिपा जुयी थन धका अन्तर्मुदृष्टिं खना
शिष्यपीं त्वलता बिज्यागु थन हे आदर्श धर्म वयना ॥३॥

श्रीश्रीश्री शिखि नां तथागत प्रभू ज्ञानं परीपूर्णह्य
यक्व कल्प लिपा बिज्यात थन हे चेला अगलं दुह्य
पेंगू जात गृहस्थ शिष्य सहित भिक्षूणि भिक्षूगण
जम्बूद्वीप निवासी धर्मरतपि तोता बिज्यागू थन ॥४॥

यनंली थुगुहे गिरीस भगवान् श्री विश्वभू ख्यातिह
जम्बूद्वीप निवासी शिष्य मुनका विज्यात आदशह,
लीपा ओं जुयिगू कथा कन फुकं शङ्का मयास्ये रती
मञ्जुनाथ विज्याणि निश्चय धका व्याख्यान याना अती ॥५॥

वस्पोलं कन थें असंख्य गुणया नादक जुया चोनह,
सद्धम्मं दृढह सुकार्य पटुह पृथ्वीतले वीरह,
चीने चोनगु पञ्चशिर्ष गिरिनं विज्यात वैदेशिक,
मञ्जुश्री जुल नां नवीन गणनां वैचित्र्य वैज्ञानिक ॥६॥

नेपाले चवनपि सुधम्मं रतपी भक्ती गुह्या दुपीं
तोताओ थकुपि असंख्य जनपीं श्री बुद्धया शिष्यपीं
स्थानाभाव जुया मछीन जनया संख्या आपाल दया
त.घंगू बनया विचं विच जुया चोंगू प्रभून स्वया ॥७॥

रक्षा याय थ्व प्राणि घेंगु हृदयं संकल्प याना अति
ताजागू गिरिसं गयाव स्वत ओं कीगू दिशाया स्थिती,
न'गं बास कया लखं त्वकपुया चोंगू गिरीं कवे खना
ह्लात खड्ग ज्वना मुसूहन हिला विज्यात शीघ्र दना ॥८॥

प्रज्ञाया बलनं दक्षीण गिरि ओं पेन्दंक पाला बिल,
प्वाचाला अन लं पिहावन फुकं जागू पुखूया जल,
खड्गं छेदन यागु स्थान क्वदुवा अद्यावधीनं दनी,
धीनाचो गिरिया दक्षीण पतिके स्वःसा अवस्यं खनी ॥९॥

आश्चर्यं प्रभुनं नवीन छविया संस्कार याना विल,
धन्यबाद बिया दुखी जन फुकं अत्यन्त खूसी जुल,

श्रीया चित्त थुलीं सुतृप्त मजुया चीनं हया लस्कर
 नापं हे हल राजपुत्र छह्य नं ज्ञानीह्य धम्मकिर ॥१०॥
 नेपाले अति हे विशाल पुर ओं निर्माण याना बिल,
 “मञ्जुपत्तन” धेगु नाम उकिया स्वयम्भमं तू तल,
 याना उत्सव धूमधाम नगरे ब्वेका अनेगू ध्वजा
 राज्यस्थापन यात राजपतने मुंका अगलं प्रजा ॥११॥
 पृथ्वीया दकले पुलांगु नगरे चोपीं विनीया बल,
 जम्बूद्वीप निवासि लस्कर लिसे सम्बन्ध भारी जुल,
 विद्या शिल्प कलादि न्हूगु कृषिनं चीनं हयाओ बिल,
 वाणिज्य व्यवहार चाल सकतां ओ हे वमोजीं जुल ॥१२॥
 भाषा धम्मं व सम्यग्गदि जाय्था फुक्कं छगू हे जुल,
 थो हे जाति निगू जिपा छह्य जुया चापि स्वदेशा दल
 पश्चात् शासन मञ्जुपत्तन पुरे मेमेगु जाती वया
 यानाओं बल हे तिनी थउँ तक अनेका राजा जुया ॥१३॥
 मञ्जुश्री नयपाल मण्डल विचे ह्यापां विज्यागू दिन
 कीस उत्सव याय मागु रसनं श्रीपञ्चमी थौं ध्यन,
 श्रीमान् श्रीगुरुयात भक्ति सहितं पुष्पादिनं पूजन
 दायेत प्रियपि मुनगु सकलें नेपाल बासी थन ॥१४॥
 ककुच्छन्द अहत्त काश्यप हनं श्रीशाक्यसिंहं थन
 तोताओं थकुपि सुशिष्य गणया सन्तान धापि जन
 धर्मा ब्राह्मण वंश्य शूद्र सहितं राजा प्रजापि मुना
 कायेगू दिन थै कश्यप मदुमां पत्रादि नीमन्त्रणा ॥१५॥

हे हे गौतमया सुशिष्य अभले इक्ष्वाकु वंशी छिपीं,
 राजा राम हनं किजा भरतया सन्तान बाकी दुपीं
 मेपीं सूर्य व चन्द्रवंशि ठकुरी श्रीशाक्य वंशी तक,
 राणा क्षत्रिय मल्ल जाति सहितं नेपाः प्रजापिं फुक ॥१६॥

हे तामाङ्ग गुरु मगसंय समी लेप्चे ब लिम्बू गण,
 नेपा जाति बुधा बुधी मयि मचा भाजू मयजू थन
 जापान् चीन युरोप दूर नगरे चोपीं स्वधर्मी जन
 पूजा यायत कास थौं सुजनपीं ! याना प्रफुलित् मन ॥१७॥

धर्मराजिक चैत्य नाम थनया बीहार थो नूतन
 याना उत्तम कार्य थौं शुभ दिने नेपाल सम्मेलन,
 श्री श्री चन्द्र प्रतापि वीर जुजुया आज्ञा वमोजीं च्वना
 भाषा धर्म सुधार याय धयिगू उद्देश्य नं की मुना ॥१८॥

फुककं ऐक्य जुया दरिद्र जनया दारिद्र्य फूका विय,
 रोगी दीन दुखी सहाय मदुपीं मालाव कीसं हये,
 शिक्षा ज्ञान विये सहायक जुया सद्धर्म न्होने तये
 वाणिज्य व्यवसाय शिल्प सहितं सेनाव कीस विये ॥१९॥

शिक्षा धर्म हनं सुशिल्प कृषिनं यन्त्रादिया उन्नति
 याना देश भरे दुखी मदयका बोनेगु की सद्गति,
 राजा राज्य बिसे नित्यं छत्त खना द्वेष रहित् की जुया
 सेवा याय स्वदेश बान्धव पिनी अर्थादि नाना बिया ॥२०॥

नेपालेश्वर मञ्जुनाथ गुरुया यांना पुजा वन्दना
नेपाल् देशिय मूल सम्मति थऊँ यांना प्रतिस्थापना,
थो कार्य्य प्रतिवर्ष यायत सभा श्रीपञ्चमी दि ज्वना
कीसं तोत्य मखू धका थन सभां यागू प्रतिज्ञा दना ॥२१॥

हे अजिमा !

(बुद्धधर्म व नेपालभाषा पत्रिकां ने. सं. १०४६)

आदो थो जगया विकाश समये शक्ती जुया देवया ।
सूर्यादी जल वायु प्राणि सकतां दय्का विज्यागू सिया ॥
शक्ती देवि धका अतीं मुनिपिसं आराधना यागुलि ।
नाना रूप कया प्रकाश जुल छी लोक्हीत याय् मागुलि ॥१॥
देवी योगिनि पीठ आदि सकतां प्रख्यात नां जा छिगू ।
भाषा व्याकसिनं जुया सकभिनं पूजा तया छुं दुगू
स्युगू छूं महिमा मखू भगवती ! आशा भती छुं कया ।
भक्ती मात्र तया वया दुख सिया सूपञ्चतालं पुया ॥२॥

रानी मन्दिराया विलाप

(बुद्धधर्म व नेपालभाषा पत्रिकां ने. सं. १०४७/४८)

प्रियतम पतियागू नित्य पूजा तयेत,
फल जल वनयागू पत्र पुष्पादि काय्त,
सुललित पथयागू दिव्य शोभा स्वयाव,
प्रतिदिन थन केगू सुप्रभाते दनाव ॥१॥

गगनस शशि तारा हीन कान्ती जुसेली,
निरमल रवियागू ज्योति पूर्व वसेली,
तनय निह्य पियारा पर्णशालाय् तयाओ,
थउँ थन जि वयागू नित्यपा थें दनाओ ॥२॥

मधुर मधु शब्दं पक्षिनं याःगु गीत,
भुनुनुनु भ्रमरादिं हाःगु सो ताल बीत,
सुरपुर सम शोभा प्राप्त जूगु थ्व जङ्गल,
थन जुयि अक्श्येनं स्वामिया कार्य मङ्गल ॥३॥

मृग गण मनमान्ती नाट्य लीलाय् सनेथ्यें,
वन पति गज हिंस्रक् जन्तु नाप ह्यितेथ्यें,
छलन गयिगु ल्यूनें तिन्हुया सिहयात,
मृगरिपु मृग नापं लिक्क वै प्रेम साथ ॥४॥

अतिशय धन कान्ति द्वेषया नाम नास्ति
 खग मृग किरि द्वीपो फुक्कहे प्रेम मुर्ति ।
 कलह मदु परस्पर् नयत्त्वने वास याय्त,
 नरजन बरु स्वार्थे कां जुया ज्वीगु ल्वाय्त ॥५॥
 रसयुत फल सःगू वृक्ष नानां दु नय्त,
 निरमल जल ओगू श्रोत दू पान याय्त ।
 अति मृदु तरुयागू छाल दू वस्त्र तीत,
 मदु थन वन जूसां छू वास याय्त ॥६॥
 नव कुसुम परागं युक्त जूगू लमीर
 हर हर थन वैगू बीत वं पुष्प सार,
 सुरसिक पिक रागी पञ्चमः स्वर प्वीक
 पिउ पिउ थन हागू चित्त आनाद ज्वीक ॥७॥
 घनरस गिरि उच्चं पात जूगू निरन्तर
 कर कर रब ओगू स्थान पत्ति मनोहर ।
 सकमल जल जागू ताल शोभायमान,
 रसन हितुगु सो सो हंसयागू वथान ॥८॥
 उपवन पटु मालीं बानलाका तयीथ्ये
 कुसुम तरु छचालं चाउला चोडगु ब्वेथ्ये ।
 थन दुगु फुक शोभा याय्मफू जि बयान,
 जुयिमखु थुलि सुन्दर इन्द्रयागू उक्कान ॥९॥
 गुलि दुगु थन शान्ती पर्ण शालाय् च्वनानं
 लदु अन रणत्रासे रानी पद्वी दयानं ।

प्रियतम थन कागू त्याग याना स्वदेश,
 अनुभव जुल आहा शान्ति शैल प्रदेश ॥१०॥
 श्वय धुन बहुरङ्गी स्वान माता हनेत,
 नव फल दत्त भिगू बीत भोजन इमीत ।
 गगनस रवि ओगू अष्टभागे ध्यनीन,
 नृपवर अन आला योग ध्याने च्वनीन ॥११॥
 मन मिन खुलुलूलू थौं विधाता छु ज्वीत,
 सकुशल अन ज्वीमा पुत्र पुत्री सतात
 समय जुल वनेगू मय्ल बिस्तार याय,
 खल जुयि प्रिय वालक् मां धका हाय हाय ॥१२॥
 क्वकिल मयुर सारस् पक्षि नाना सुस्वोरं,
 नकतिनि थन हाःपि ग्याःगु छाय् सो अघोरं ।
 विरहजनित शब्दं हाःगु कल्लोल लोलं,
 कुलवधु थव प्यारा सीभले ख्वैगु तालं ॥१३॥
 कपि शशक शृगालः व्याघ्र भालू हरीण,
 महिष गज गयेडा सिंह शार्दूल चीन,
 अतिशय भयभीतं ब्वांजुया हागु नादं,
 वन श्वत घनघोरं जन्तुयागू कुशब्दं, ॥१४॥
 पशु गण बहु संख्या पर्णशालां जिपाखे,
 स्वस्यबल अति वेगं आतुनं श्वास ह्लासे ।
 छह्य निह्य बनजन्तू मेदिनीसं ग्वतूल,
 धर धर निख्य नेत्रं खोबि धारा पिकाल ॥१५॥

चनचर विरहाग्निं दाह याःगू खनाओ,
फल फुल धकि जागू लैयस हाकू तिनाओ,
कटपट गृह ध्येका स्वेगु आशं मचात
गुलि फत उलि वेगं रानी ब्वांब्वां विज्यात ॥१६॥

हृदय नृपवधूया साप उद्विग्न जूल,
चपल नयन न्ह्योने अन्धकारं त्वधुल ।
मखन पथस चोंगू कं दुगू कारात,
मृदुल पदस नाना कण्टकं छेद यात ॥१७॥

रुधिर वन मदीसे देविया देह न्यंक
गन वन अनयागू मेदिनी लाल ज्वीक ।
शरिरस अति पीडा जूगु छूँ छूँ मचाल,
फगत गृह लुमँका इबास ह्लागू विशाल ॥१८॥

तरुस खन अनेपि पक्षिनं शोक याःगू,
सनमुख खन रानीं लें पना जन्तु खोगू ।
वन चर फुकमीके रानिनं विन्तियात
“अनुज गन चिलाव्यू दुःखिनी छें वनेत” ॥१९॥

चचन विकल याना विन्ति याःगू न्यनाव
शशि सम मुख कान्ती हीन जूगू खनाव
अति शय दुख केना शैल वासी सरासर
वनविच वन द्वाहा मार्ग तोता धराधर ॥२०॥

फणि गण अति बेगं मार्ग चानाव ओंगू
दुशकुन खन रानीं बंक मध्ये अनेगू

परमपि उकियागू ध्यान छूँहे मयासे,
शर सम वन बेगं श्वास नापं मल्लासे ॥२१॥

भवन निकट शीघ्र रानि थेंका छचालं
स्वत अन दशदीगे दृष्टि हीका आपालं ।
तदपि मखन प्राणऽधार प्यारा मचात,
थन अन वन घैगू स्थोर छूँ याय् मफूत ॥२२॥

ह्मिग ह्मिग जि खनेओ पुत्र जालीकुमार,
भमिनि सहित याना ब्वां वयी दूर दूर ।
कुसुम वनसं होगू हार दय्का हयागू,
हतपत निहसीनं तिन्हुया काः वयीगू ॥२३॥

प्रथम कुसुम पुत्रं फुक्क कायी खयानं,
ऊन खयि मुकुमारी पुत्रि कृष्णाजिनी नं ।
जिगु जिगु जिगु दाजू छाय्कया छुं मलयंक,
हकि हकि जिगु धाक्षां ल्वावनी स्वान स्यंक ॥२४॥

प्रिय सुत निहसीतं चूत चम्पा चमेली
दुगु कुसुम इनाओ शान्त याये धुसंली
रसन वनि ह्मिताओ नित्य आनन्द केना
गन वन थउँ हा ! हा ! बंक हे शून्य याना ॥२५॥

वन जुयि नदि तीरे वा वने दूर थ्यंक,
विपतस कयन जूयी प्राण आशा मलयंक ।
मखनिमखु पति नं पुत्रपि ओंगु स्थान,
मनस थुलि तयाओ योगशालास ओन ॥२६॥

तन मद दश इन्द्री ध्यानसं स्थीर याना
 खन अन जुजु चोंगु आसन स्थीर याना ।
 प्रथम पति सुपादे भक्तिनं भोकपूल,
 सविनय नृपयाके बिनित यानाव धाल ॥२७॥

सलकिसि रथ नाना स्वच्छ मूर्ति सिं यागु,
 प्रिय सुतपिनि ह्नि ह्नीं प्रेम याना ह्मितैगु,
 वन बिच फुक तांता छूँ मस्यूपि अनाथ,
 गन वन निम्न नारां हे प्रिय प्राणनाथ ॥२८॥

वन वन हितु हीना वृक्ष माला अनेगु
 नव नव फल भिगु न्हूगु खाना ह्यागु
 गुगु यल उगु भोजन् नित्य याका तयापि,
 गन वन प्रिय वालक् थौं प्रभाते दनीपि ॥२९॥

निरमल नदियागु नीरनं स्नान याका,
 वलकल तरुयागु स्वच्छ वस्त्रं तियेका,
 कुटि बिच तृणशय्याय् जि थ्यना तैथकापि,
 गनवन अतिमुन्दर वाललीला वयनीपि ॥३०॥

प्रफुलित वनयागु वासनं पूर्ण जूगु,
 नव कुसुम अनेगु जि हनाओ ह्यागु,
 प्रतिदिन निह्यासीतं हार तीका तयापि,
 गनवन थन तोता चित्त आनन्द बीपि ? ॥३१॥

लुबुलुबु वयि न्ह्योने दाजुया हस्त जोना,
 हसित वदन याना तोतलावाणि ह्लाना,

प्रति कुसुम क्यनाओ नाम नेता चवनीपि,
गनवन हृदयेया स्वच्छतारा जि योपि ? ॥३२॥

तपभवन समीपे वास यानाव चोपि
मृग मयुर मयीना हंस आदी अनेपि,
प्रतिदिन अमि नापं भ्रातृभावं ह्यितंपि,
गनवन हृदयेया रत्न भाःपा तयापि ? ॥३३॥

शशधर नभ मध्ये चाहिला रात्रियागू
जग बिच तमं तंका वीह्य थ्ये नाथ कीगू
हृदय नभस चोंगू अन्धकारः फुकैपि
गनवन शशि निह्यं तेजनं पूर्ण जूपि ? ॥३४॥

धरणितनस थःगू रश्मि याना प्रदान
सरस कमल ह्वेका वीह्य सुर्यः समान
जियु हृदयस चोंगू पत्र ह्वेका वियोपि,
गनजुल रवि अस्तः थो वने चाहिलीपि ? ॥३५॥

तन उपवन भाःगा जल् विया नेत्रयागू
हृदय बिच लता जि प्रेम याना पिनागू
सुरभि ऋतु वसेली श्यामता रङ्ग ओल
गन वन व लता थौं चित्त हा शून्य जुल ॥३६॥

लघु गुरु दुख मेगू छुं खनानं मग्याना,
फगत सुत पिनीगू स्वस्तिया आश याना
हरण जुल व हे थौं रत्न भारी अमूल्य
प्रिय ! जिगु जुल हाहा देह थौं मृत्यु तुल्य ॥३७॥

तन मन बचनादि पाप छूँछूँ मयाना,
 फगत फल नया जि कानने वास याना
 तदपि कुटिल दैवं थो मयासे विवेक,
 विल अति दुखदायी व्यर्थ हा! पुत्र शोक ॥३८॥

प्रिय सुत मदयेका छबीत थो तुच्छ प्राण ?
 जग बिच हतभागी दैमखू जी समान ।
 धिक धिक निरलज्जा प्राण थौं छाये मओन ?
 जलस कुति बनावसां याय जि थवीत दान ॥३९॥

विरह अति जुसेलि भूमिस गोतुलाओ,
 कृत कृत शिरयागू केशपाशः पयनाओ,
 हृदयस थव ह्लातीं यात बेगं प्रहार,
 उयिँ सम जुल रानी शोकनं बार बार ॥४०॥

अतुल विरह याना खोगुलीं दीर्घकाल
 हिकु हिकु जक लंका वाक्य मेगू मओल ।
 धर धर बल क्वागू नेत्रनं वारि धारा,
 तर जुल तनयागू रानिया वस्त्र सारा ॥४१॥

प्रति क्षण जुल वृद्धी चित्तया व्यग्र क्कन्,
 मफुत सहन याये छोगु शोकाग्नि दन्दन् ।
 मन बचन शरीरं चेत याये मफुत,
 जुल अन सुकुमारी भूप न्होने अचेत ॥४२॥

यदि थन खन धासा शोकया उप्र काय,
उषल हृदय जूसां फैमखू घैर्य याय ।
थिक थिक घटनाया याय् मफू जि वयान,
धिक धिक! जिगु हा! हा! लेखनी शक्ति हीन ॥४३॥

मृत्यु !

(बुद्धधर्म व नेपालभाषा पत्रिकां ने. सं. १०४७/४८)

थ्व बिश्वया वन्धन छुं मर्त्यक,
मुक्ती बिया चोह्य महान एक,
छंके दु ह्नां, अद्भुत ईशशक्ति,
प्रणाम हे मृत्यु! छितः सभक्ति ॥१॥
हे मृत्यु ! छंगू महिमा अपार,
खना मर्ग्यापि मद्दु बारवार,
विश्वे मद्दु छेँ गननं थुजोगू,
प्रभाव छंगू रति न्यून जूगू ॥२॥
उपाय यासा सकतां जूयेफू,
सिया बने मोक सदां सु म्बाय्फु ?
लेनी मखू सूं फुक प्राणि सीगू,
प्रयत्न कीसं थन व्यर्थ याय्गू ॥३॥
कठोर ज्वीफू विधिया दयेके,
थाकू मच्चा छं उकियात स्थंके ।
वास्ता मयासां लुमना बयीगू,
छंके दु सामर्थ्य विनाश यःय्गू ॥४॥

विद्युत् द्रलंदोल सिनं विशेष,
 हे देव! छंगू द्युति पूर्ण वेष ।
 सर्वान्तकारी बल छंगू चोंगू,
 संसार लीलास्थल छं हितैगू ॥५॥
 आदिं निसें हे अति क्रूर दृष्टि,
 यान नया छं च्वन सर्व सृष्टि ।
 यक्को स्वथंसां उदरे मजागू,
 क्षूधा गुजोगू जुल हाय छंगू ॥६॥
 उत्पत्ति जूयी गन न्हूगु सृष्टि,
 तुरन्त थ्यकं अन छ कुदृष्टि ।
 स्वीगुं भतीचा खनि छिद्र काय,
 घुतुक्क नै छं उकियात हाय ! ॥७॥
 थ्व कृत्य छंगू अति हे कराल,
 मधा थ्व छं वृद्ध युवा न बाल ।
 सर्वत्र छंगू जुल भाब एक,
 मया भतीचा गननं विवेक ॥८॥
 लाखों विना वान्धव दीन यात,
 लाखों पिता, पुत्र-विहीन यात ।
 जोडा सुयात जगते न ल्यंकू,
 सम्बन्ध स्वीगू थन छं मस्यंकू ॥९॥
 मखनि जि व्यक्ति गनं थुजोहा,
 छं ब्यूगु पीरं गवलें मखोहा

छंके मदू त्हां करुणा धयागू,
स्वीगुं मखंदी थुलि चित्त छागू ॥१०॥
छंगू गुथाय् व्यक्त जुयी प्रभाव,
उथाय् खने दै विपरीत भाव ।
आनन्द दायी गुलि दू पदार्थ,
मानो इपि हे दनि भक्ष यायूत ॥११॥
प्रसून शय्या जुलसां विशेष,
शूगू मखूसो गुह्यस्या निमेष,
अहा ! व हे छं गन तेव सतै,
क़शानु शय्या बिच हाय तोतै ॥१२॥
शङ्का सुयागुं गबलें मयाह्य,
निस्तेजता श्री गननं मजूह्या,
उजाह्य जूसां लुमनेव छन्त,
क़सङ्क ओकै दृढतागु चेत ॥१३॥
सू राज सू रङ्क हरेक सीगु,
तथापि जायी मखु कोष छंगू,
छंगू मुले फुक्क थ्व सृष्टि छंगू
म्वाना च्वनी सुं जगते मखूगू ॥१४॥
स्वच्छन्दतां उत्सवयागु रागे,
रंगे जयाओ ह्यिग चोह्य स्वांगे ।
दिपे घना थौं च्वन ह्यो ! व व्यक्ति,
ओया कुटुम्बे जुल आ विरक्ति ॥१५॥

मदूगु जूसा बिधिया सुदृष्टि,
 उत्पन्न यायी मखु न्हूगु सृष्टि ।
 मशान जूयावनि विश्व व्याकक,
 बैगू मनं भोजन छत्त गाकक ? । १६॥
 पाताल पृथ्वी शशि सूर्य तारा,
 ध्व विश्वया मेगु पदार्थ सारा,
 सर्वत्र कालं हल ध्वातु ध्वाना,
 छंगू समीपे बल नित्य ग्याना ॥१७॥
 रक्षा सदानं गुगुया सचेष्ट,
 याना मनुष्यं जुयिगू यथेष्ट ।
 अन्ते जुयी नष्ट व हे शरीर,
 आकाश-भू-वन्हि समीर नीर ॥१७॥
 महीतले ज्वी गुगुया विकाश,
 अवश्य ज्वीगू उकिया विनाश ।
 छगू व हे दू शुभ कीर्ति ध्यारी,
 ओ मृत्युनं यंक्य मफूगु भारी ॥१८॥
 हे विश्व ! निद्रा-भ्रम भाव तोता,
 दना स्व शय्यां थन कार्य आता ।
 जोनाव मृत्युं शिरयागु केश
 प्याखं हुयका तल देश देश ॥१९॥
 बलाभिमानि धरणी धनेश,
 छं धा इपि आ मन दू जनेश?

संसार तोता वन एक एक,
 प्रताप केना निन्दुयागु टेक ॥२१॥
 हे मृत्यु छंगू! अति हे विचित्र,
 न्ह्योने खना नं कपटी चर । ।
 मजून धासा थन आ सवेा,
 ओं कष्ट कायी भवया अनन्त ॥२२॥
 विश्राम गब्लें गननं मगाह्य,
 शरीरित्यगू परिणाम कयंह्य,
 सबंत्र हे विश्रुत नाम छंगू,
 हा सर्वथा निष्ठुर कार्य छंगू ॥२३॥
 संसार याना जुल छं विनाश,
 छंगू मजू हा! लय प्रकाश ।
 ज्वीहे मखू छंगु विनाश हाय!
 दुःखी मनूया अत्य छू उपाय? ॥२४॥
 आधार सूं हे मदयाव चोह्य,
 हा! दुःख हे दुःख सियाव जूह्य,
 छ हे वया वैत मुले तयीगू,
 हे मृत्यु! छं हे चिर शान्ति बीगू ॥२५॥
 बखान याये मफु छंगु शक्ति,
 हे मृत्यु! अय्नं थुलि याय विन्ति—
 कुटुम्ब योपि प्रिय बन्धु मेपि,
 वियोग याये मत्य चित्त जोपि ॥२६॥

कीर्तिया लँ

(बुद्धधर्म व नेपालभाषा पत्रिकां ने. सं. १०४६)

जगते कीरति ख्याति यायसा
स्वारथ तोलते माल ॥ध्रु॥
खव मखु धैगू थुगु खेँ कीसं
तर्क याना च्यने मय्ल,
सत्य साछी शाक्यमुनिया
जीवन सो अनमोल ॥१॥
प्राणीपिनिगु दुःख फुकेत
तोतल राज्य विशाल
तोतल प्यारी उत्तम नारी
यशोधरा सुकुमारी ॥२॥
प्रेमया मूरति सुन्दर तनय
राहुलभद्र कुमार
त्याग याना ओन रजनी मध्ये
सियका मोह असार ॥३॥
राज भवनया सुखयात पैका
दुर्ग बने दुने ओन,
ज्ञान माला स्वत ध्यान तथा अन
तोता भय अभिमान ॥४॥

सार वचन

(बुद्धधर्म व नेपालभाषा पत्रिकां ने. सं. १०४६)

शाक्यमुनिया सात्त्विक वाक्य
विचार या नर नारी ॥ध्रु०॥

कपट भाव हृदते मतसे
उदार की जुय माल ॥
विश्व निवासी प्राणी सकलें
कुटुम्ब मालपि धाल ॥१॥

जलचर थलचर कीट पतङ्ग
जीव धारि गुह्य जूल ॥
तन मन वचन सकलें कीस
प्रेम यांना चवने माल ॥२॥

क्रेल बखेडा मखुगू यांना
दयका नैतिक जाल ॥

भूमि भवन व धन जन रतन
काय मते परयागु धाल ॥३॥

प्राण हे कण्ठे यदि ध्यान धासा
लहाय मते मिथ्या बोल ।

निरन्तर सत्ये अतल जुये गू
जगते धरमया मूल ॥४॥

मनया उद्गार

(बुद्धधर्म व नेपालभाषा पत्रिकां ने. सं. १०४६)

प्राचिन चाल आयात मजिल
कीसनं धन मुने माल ॥धु०॥
सकसिनं हल नूतन चाल
की जक लिपा च्वने मयल ।
नवीन माल थन हया बिल
धन कीगु विदेशनं काल ॥१॥
ज्या याय मोल सुख धका जूल
कङ्गालनं कीत चिनाइल ।
भयानक भूल खने दया बल
आयात होस याय माल ॥२॥
उन्नति शील बिदेशया जाल
चःफुना वांछ्वये माल ।
अैयासि चाल निश्चय मजिल
ज्या याना कीसं नय माल ॥३॥
आयागु कालं सकसितं धाल
विद्या ब्वना सुखसिय माल ।

ज्ञान विज्ञान छूँ की मसल
सकसिनं हेला याना हल ॥४॥

धन्ना जूल मन जिगु खोल
धीरज गथे याये माल ।

‘अष्ट वेद गगन छि’ साल
च्वया जिनं मनयागु हाल ॥५॥

गीत

(बुद्धधर्म 'व' नेपालभाषा पत्रिकां ने. सं. १०४६)

बहु कल्प वन बल अनगिन्त,
गम्भीरगु दृष्टि कना जन पित्त
ध्यान बिया अवलोकन यात,
खन महापुरुषं दुखि पित्त ॥१॥
रोग शोक सहितं मृत्यु क्लेश
त्येके मखु जनया दुख शेष
थुलि याना प्रभुनं सङ्कल्प
त्याग यात गृहया सुख अल्प ॥२॥
सम्राटया प्रिय सुत छलपोल
संन्यासि रूप कया पिहावल,
राजनीति निपुण अति वीर,
सिन्धु सम प्रभुया मति धीर ॥६॥
प्राणि पिनि दुख मोचनयात
बसे कया दस इन्द्रियपित्त,
रति प्रीति मतसे थव प्राणे
मग्न जुया च्वन दृढ ध्याने ॥४॥

रजनो सहसा दुने छातौ
 उत्पन्न जुल अदभुत ज्योति !
 अले तिनि करुणामययात
 जन बोध यायगु ज्ञान लात ॥५॥
 नाशयात पर घाटक कर्म,
 प्रचलित यात अले सम धर्म,
 पूर्ण जुल भूमण्डल ज्ञानं,
 अनन्त प्रभु या थुगु वचनं ॥६॥
 निर्मल महा धर्म सिन लोकं,
 प्रभु नाम धन्य धाल टेकं
 तोतल सकसिनं पर हिंसा,
 शान्तिमय पृथिवी जुल खासा ॥७॥
 वज्र देश विच थ्व अति सुन्दर
 दयका जिमिस जिन मन्दिर,
 श्री महा धर्म राजिक चैत्य
 नाम तया जुल आ कृतकृत्य । ८॥
 श्वर्ण मय स्तूपया धर्मग्रन्थी
 छलपोलयागु शुद्धगु अस्थि
 सन्हृदय मित्रपि फुक जाना
 विधि पूर्वक स्थापना याना ॥९॥
 हे गौतम ! महा मुनि श्रेष्ठ,
 यात यात जिमि दुर्मति नष्ट

छलपोलयात थौं सु-मधूरं
 स्तुति याय जिमिसं एक स्वरं ॥१०॥
 प्रियदर्शी नाम नृपयागू
 विक्रम युक्त शासन भिगू
 दुर दुर देशया दिग दीगे
 व्यापक जुया च्वन गुगु समये ॥११॥
 सु विशाल थुगु भारत भूमी
 युद्ध व शान्तिया पथ मामी
 क्यना च्वन जनपि भ्रम जाले,
 वास्तव मसिया उगु काले ॥१२॥
 बुद्धया वचनाऽमृत खास
 धम्मया मूलगु उपदेश
 प्रचलित यात छि उमु यूगे,
 निर्भीक रूपं दश दीगे ॥१३॥
 पाषाण विच अङ्कित याना
 भगवान् बुद्धया यश गाना
 घोषण यात छि अविरामं,
 पृथिवी तलसं धुम धामं ॥१४॥
 गुहा विहार देवल स्तम्भ
 दयकेगु कृत कृत आरम्भ
 याना व बिज्यात अन गिन्ति,
 उप युक्त कालया परिपाटी ॥१५॥

अविरत नृपया करतूतं
 देश, गिरि, पतिकं नव छातं
 निमणि यात सुन्दर मुर्ति,
 चित्रकारपिनि हस्तया कीर्ति ॥१६॥
 राजत्व कालया अभिमान
 केनेगु भूपया मखु ध्यान,
 केवल प्राणिया उपकार
 याय धैगु हृदये सु विचार ॥१७॥
 निस्पृह ज्ञानया दत चक्षु
 अन्त्ये जुया काल नृप भिक्षु,
 अलग जुया अले भ्रम जालं
 नर देह तोतल वसपोलं ॥१८॥
 भगवान्यागु उत्तम धर्म
 शान्ति वःगु जगते अति गर्म,
 करुणासिन्धुया करुणानं
 वीर अशोकया गुण ज्ञानं ॥१९॥
 साहस दृढ याना उपयुक्त
 उद्योग यागुलि उपरोक्त
 प्राप्त जुल व हे निर्मल शान्ति
 नाश याना बीगु तम भ्रान्ति ॥२०॥
 पवित्र देवालय प्रभुयागु
 दयका जिमिसं थन न्हूगु

ख्याति जुल धर्म राजिक चैत्य,
वङ्ग देश विच निश्चय नित्य ॥२१॥

हेगुरु ! गौतम ! प्रिय गोष्ठी
छलपोलयागु प्राचिन अस्थि
नूतन स्तुपया थन काये
विधि पूर्वक स्थापना याये ॥२२॥

कया कया प्रेम लय तान
छलपोलयागु हे स्तुति गान
यायगु जिमिसं एक स्वरं,
कोकिल ह्वालि थ्यें सु-मधुरं ॥२३॥

हे केशव ! मोहन ! छगु बार
बुद्धयागु वेशं अवतार
कयाव विज्यात थुगु भूमी,
धन्य थ्व भारत भव स्वमी ॥२४॥

हे विश्व व्यापक जग प्राण
छलगोलयागु नां गुण ज्ञान
सदान व्यापक जुय माल,
स्थीरं भारते चवने माल ॥२५॥

अनन्त कालनं सुयि मखुगु
साहित्य दतले तनि मखुगु
सुन्दर शब्द मुना प्रिय भावं
स्तुति यात अभले जयदेवं ॥२६॥

प्रभुया उपासक फुक जाना

छचालं मुना उत्सव याना

एक मत वचनं यात गान,

वङ्ग पुरे थौं साहस केन ॥२७॥

छलपोलयागु ज्ञानया ज्योति

बिय माल हे गुरु लख कोटि

जुया वनि जिमि मत्सर भङ्ग,

उद्धार याये अले नव सङ्घ ॥२८॥

लोकोत्तर ज्ञानया मार्ग

प्रकाश याना वी अकी दुर्ग,

यमपुरी वनिपि व दुवात

नर्कया मार्गे लाई मखुत ॥२९॥

प्रज्ञा सु ज्योति व उत्सुकया

केन्द्र मूलस्थान थन जुया

थुगु महा धर्मराजिक स्तूप,

उकीसनं जुयमा सम भूप ॥३०॥

अलङ्कापुरी थ्ये दुगू सत्ता

ख्यातिगु वङ्ग बिच कलकत्ता

नूतन थन दुने सुर-धाम,

श्री महा धर्मराजिक नाम ॥३१॥

हे मुनि गौतम, हे जिनराज,

थौं याय जिमिसं उत्तम काज,

अस्थि स्थापनाया थन चैत्य,
 फैमखु थनसुं हिंसक दैत्य ॥३२॥
 जिमिसं याय थौं भक्ति ज्वरं
 सकलें थन मुना एक स्वरं
 स्तोत्र सहितं गाथा भाग
 सङ्गीत याये नूतन राग ॥३३॥
 आधुनिक युवकया दिलदार
 प्रफुलित कुमुमया मदु हार,
 केवल प्रेमया रस सार
 अर्पण याय प्रभु उपहार ॥३४॥

श्री भगवान् निर्वाण

(बुद्धधर्म व नेपालभाषा पत्रिकां ने. सं. १०४६)

दोछी सहीतं सत वर्ष पेंगू

अंदाज ह्वापा शुभसालयागू

श्री बुद्धदेवं निरवाण काःगू

हा! शोकया दुर्घटना थ्व कीगू ॥१॥

विशाध थ्वो भारत पुण्य भूमी

कुशीनगर्द अद्वितीय नामी,

आनन्द दायी शुभ शान्ति कारी

चीकीव घंसां रमणीय भारी ॥२॥

यायीगु सारा अन राज काज

सम्मेल जूया दुनिया समाज,

भापाव हेमार्जन मूल मन्त्र

याःपिं मदू शासन एक तन्त्र ॥३॥

उकिं ब राज्ये धनया विनाश

मज्जुगुलि दुःख जुयाव नाश

क्रान्ती फुना शान्ति सु-वृष्टि माःगू

संपूर्ण पूरे पत्रिपूर्ण जूगू ॥४॥

पूर्णं प्रजातन्त्र प्रणालियात
 सामान्त जूषि अन मत्त जात,
 निस्वार्थि विद्वान उदारचेता,
 धन्यः छिपि शासन कार्य वेत्ता ॥५॥
 थ्व हे शहर्या निकटे सुरम्य
 दू शाल सीमा घनगू अरण्य,
 वृक्षे जुना चञ्चल पक्षि नाना
 याना च्वनी सुन्दर नित्य गाना ॥६॥
 मचोस्य संसार असार धूपे
 दूर्गम्य थो काननया समीपे
 कुटी दयेका वहू शिष्य मुंका
 बिज्यागु हा! अन्तिम काल थ्यंका ॥७॥
 थ्व हे कृटीया विच भूमि भागे
 चोनाव छूँ काल समाधि योगे
 मुंका समीपे प्रिय शिष्यपित
 निर्वाण शय्याय् भगवान् बिज्यात ॥८॥
 थ्व कृत्य सीया मुखयागु कान्ति
 मलीन याना अन भिक्षु जाति
 हा नाथ ! हा देव धका विलाप
 याना छत्रालं च्वन साफ साफ ॥९॥
 थुजोगु काले अन हस्त पत्त
 सुबुद्धि आनन्द वयाव क्त

तयाव शोकानलयात गुप्त
 ओं भिक्षुपिके थुगु प्रश्न यात ॥१०॥
 देवेन्द्र श्रीश्री भगवानयात
 स्थान थव ज्यूला निरवाण ज्वीत?"
 थव प्रश्न नेना मुनिराज बुद्धं
 आज्ञा दयेकाव बिज्यात शुद्धं ॥११॥
 "हे भिक्षुपि ! न्यो मन शान्त याना
 आदेश वी सत्य यथार्थ केना,
 निकृष्टगू देश धका छिमीसं
 भापे मते सो थनया द्वेषं ॥१२॥
 मेमेगु न्यूनाधिक कार्य जूसां
 राज्ये प्रजातन्त्र प्रणालि खासा,
 प्रबन्ध याना तल युक्ति साथ
 स्वीतं मयासे थन एकनाथ ॥१३॥
 उकिं थव भूमी अति पुण्यकार
 याना चवने म्वाल जिगू बिचार,
 तथापि आदेश सुमर्ण याना
 संस्कार याय्गू फुक भिक्षु जाना ॥१४॥
 प्राचीन काले भगवान जूपिं
 सम्येक दीपंकर आदि धापिं
 संस्कार वस्पोलपिनीगु जू थें,
 याय्गू छिमीसं जिगु नं वत्त्वोथें ॥१५॥

आनन्द भिक्षुं थुलि वाक्य नेना
कनेत पूरे वन दुःख जोना,
सभा गृहे थौं अन मन्त्रि मूंगु,
संयोग नं थो दिन नापलागु ॥१६॥

मल्ल प्रमूखं धनि मानि ज्ञानी
एकत्र जूया अन राज धानी
सेनी धका शासनयागु काम
विचार याना च्चन धूम धाम ॥१७॥

अत्यन्त हे कातर भाव याना
हा! व्यग्रतां स्वास विशाल ल्लाना
आनन्द थ्यंकः वल हत्त पत्त
सभा गृहे वं समाचार वीत ॥१८॥

श्री शाक्यसिंहं निरवाण ज्वीगु
इच्छा कया स्पष्ट धया विज्यागु
सभा बिचे फुक्क कना विज्यात,
तुरन्त शोकं अन राज यात ॥१९॥

सन्देश नेना अन फुक्कसीत
उद्वेगनं शासन उग्र यात,
मज्जलादिनं हार्दिक व्यग्र स्याय्त
सभा बिचे भाषण खूब यात ॥२०॥

“हे विप्र ! भट्टारक बन्धु वर्ग
हे सैन्यपि ! रक्षक देश दुर्ग

तोहा वनेमाः थन राज काज,

न्याय प्रबन्धादि सभा समाज ॥२१॥

हिंसादि आचार बिनाशकारी

सत्य प्रणाली दृढ भक्ति धारी,
थो नाथ, थो दास विभिन्न कारी

कुनीतिया बुद्ध विरोधि भारी ॥२२॥

प्रजापिनी अर्थ, अनर्थ भोगी

मदान्ध मोही मखु राज रोगी,
पराक्रमी वीर स्वराज त्यागी,

संसार उद्धारक कर्मयोगी ॥२३॥

अनाथया साथ जुयाव नाथ

साम्य-श्रुतीया जनपित पाठ

सेना कना ब्यूह जुया भिखारी,

निस्वार्थि निर्भीक अरण्यचारी ॥२४॥

व दीन स्वामी नय मार्ग गामी,

व विश्व प्रेमी सम न्याय नेमी

संसारया सार विचार याःह्य,

असार तोता भगवान जूह्य ॥२५॥

हा! विश्व खेका जग कीर्ति व्यापी

ओनीन हा! हा! जगया प्रतापी,

वस्पोलया अन्तिम काल अग्र

थ्यंकः वनेमाः अन शीघ्र शीघ्र ॥२६॥

कुटी वना अन्तिमकार्य यायू
 अवश्य कर्तव्य महान कीगू'
 सभां थुली भाषण याय धुंका
 प्रस्थान याना वन सैन्य मुंका ॥२७॥
 श्री बुद्धया आश्रम कृत थेन,
 अष्टाङ्ग याना अन फुक्क चोन,
 निर्मोहिता अन्तिम वाक्य नेन,
 संसारया सार अमृत तोन ॥२८॥
 छुं काल लीपा निरवाण जूल,
 भिक्षू सहीतं जन फुक्क खोल-
 चन्दाल मृत्यु गुरु नाश यात,
 हा! क्रूर कालं भव भस्म यात ॥२९॥
 सुगन्ध धूपादि सु-पुष्प नाना
 कर्पूर श्रीखण्ड घृतादि येना
 हा ! त्याग याना मनयागु मोह
 संस्कार यात प्रभुयागु देह ॥३०॥
 चितां दध्वी अग्नि छवया विशेष
 शरीर सारा नल हा ! निशेष,
 बाकी दुगू भस्म महाविभूती
 संपूर्ण काःपिं अन मल्ल जाति ॥३१॥
 थाय् थाय् पतिं स्थापन याय नित्य
 गर्भे तया भस्म अखण्ड चैत्य

प्रस्तावना मल्लपिनी श्व जूल,
 मेमेगु देशं समचार सील ॥३२॥
 श्री बुद्ध हाले निरवाण जूहा,
 क्षत्री कुले जन्म कया बिज्याहा,
 जिपिं व लीसे सम एकवंश;
 कृपा तया भश्म इनाब्यू अश ॥३३॥
 धया अनेपि वल राजदूत
 पेंगु दिशा नं अन भश्म कायूत,
 श्व भश्मया सप्तम भाग जूल,
 मल्ल पिसं पञ्चम भाग काल ॥३४॥
 चाकी निगू भाग नृपालपित
 स्वजाति भापा बिल प्रेम साथ,
 प्रत्येक भागं अनमोल ह्यगू,
 पृथ्वीतले स्थापन चैत्य जूगू ॥३५॥

धम्मपद

(डा. इन्द्रमानया धम्मपदं)

“जय जग हितकारी, विश्वया बन्धु भारी,
अतिशय तपधारी, शान्तिशास्त्रे विचारी
अमृत वचन मुँका ज्ञानया पुष्प ह्वेका
‘धम्मपद’ विल देका धन्य छि मार ख्वेका ।”
“दरुय् भिगू दान प्रतिदिन मुना धर्म बियगु”

विहार

संसारे जन्नि सुधर्म मसिया कां थें जुया च्वंच्वन,
पापी स्वार्थि जुया दयादि मदुगू श्री बुद्धनाथं खन,
भिगू स्थान स्वया विहार दयका वंगू सुबुद्धी बिया
ओया थौं उगुहे विहार पतिकं सूपश्चतालं पुया । १०५६

बुद्ध गन दु ?

जीवात्मा सकलें समान खनका ग्रन्थादि नाना च्वया
दानी ज्ञानि जुया सुप्रेम पथसं ओनेगु शिक्षा बिया
वःह्य श्री भगवान बुद्ध गन दू मालेगु इच्छा तथा
ओया थौं सकलें विहार पतिकं सूपञ्चतालं पुया । १०६०

चैत्य वन्दना

श्री चैत्यराज जिनया शरणे वनाव
आनन्द याय प्रभुया चरणे च्वनाव,
स्वर्गे वने दइ थुकिं नर जन्म धुंका
घेगु मती जिमि तथा परिवार मुंका
दिपंकरादि फुक प्राचिन बुद्धपिन्त
पूजा तथा मधिचधी फल फूल छायात्त
प्रेमं वया थन जिपिं मदु क्लेश लेश
सोया विज्याहुँ शुभ दृष्टि तथा निमेष ।
(थुलि तक प्रकाशित रचना)

सिन्हाज्याया ढवीं

धन्य धन्य ज्यापुया मचा, गुलित मति धीर,
तःकू ज्वना बुँनाप त्वाइ, अति हे सूस बीर ।
दैत्य सैन्यपिन्त गथे देवन आँगसँ प्वी
अथे हे ज्यापु बीरपिसं पुवाचा ज्वना ली ।
म्हू म्हू चिना पुवाचा ज्वना पुवाचा ढवीं पिना
ताल तालं प्याखन हुइ, ज्यापुया ललना ।
पित्यात आःला बाह्लि जाल, बजिने त्यल धाइ ,
फुक्क मुनि द्यांक्वे च्वनी, लपते न्ह्योने लाइ,
बजि आलु मुस्या पालु, छ्वेला घासा तइ
हिसिचा दुह्य ज्यापुनिमयजुं, सोमा ज्वना वइ ।

खेद

श्री, कामिनी काञ्चन, देव देवी,
आवाहनाचार्य मकार-सेवी
असत्यवादी परकोषहारी
धिक्कार आधुनिक वज्रधारी!
ने, सं. १०५०

प्रेमिका-चरित्र

कामिनि युवति थव प्रिय खनेव

सरमया नकल याना क्यनि ॥१॥

क्यलेहन मिखा कनि, मरखया म थें स्वया हुइ,

सखियात धितु धिना सनि

सखियात छलय् याना प्रिययात मिखा तइ,

सरम नं फः फः हिनाक्यनि ॥१॥

चन्द्रमाया ढंगु खवाने चंगु रङ्ग

बाल रवि सम जुया दनि ।

चित्रीगोगु मोति थें खवाले वःगु चःति

साचवतं हुत्तुहुया च्वनि ॥२॥

हे देवी !

जैशंभायन व्यास आदि मुनिनं माता धका धैतल,

हे देवी, गुण ज्ञान बीह्या छि धका उच्चासने तैतल,

खाला थो मखुला वयान जक ला शंका जुया थो मने

इच्छा जि स्वय्गु तया थन वया श्रीपञ्चमीया दिने ।

ने. स, १०५०

श्री भगव न बुद्धयागु अमृतमय उपदेशया संग्रह स्वरूप

‘धर्मपद’

यमकवर्गया भाषान्तर

आः कीत जूगु गुलि दु सुख दुःख फुक्कं
कीगु विचार-विटपे फल सःगु व्याक्कं,
थ्व वृक्षयागु जुल हा मनया विचार
व हे विचार वलनं जुयिगू प्रसार,

भाःपा मभिगु गुह्यस्यं वचनादि ल्हायो
पापं सहीत अथवा खल-कर्म यायी
त्यूल्य वयी उह्य लिस्ये तमः दुख, ताप
धच्चाः गथे रथ लिना वयि अश्व नाप ॥१॥

कीगू विचार गुणया परिणाम की हे
भिगू मभिगू सकतां फल वीगु वं हे,
पृथ्वीतले गुगु पिना उगु वृक्ष व्वीगु
व थें विचार गुगु खः उगु कीत उवीगु

ल्हायी सुवाक्य गुह्यस्यं कुविचार वाना
वा कार्य यायि मननं सुविचार याना
वया लिसे सुख निरन्तर मुक्ति जोना
द्धाया समान वयि निश्चय प्रेम याना ॥२॥

दायाव बोबिल जितः उह्य दुष्ट शक्तिः
 युद्धे बुका यन धनादि अमूक व्यक्तिः
 चित्ते सुनां तयि थुगू कुविचार याना
 वैगू मने च्वनि सदां तम द्वेष नाना ॥३॥

मेव बुकै वल करना धन हर्ण यायी
 दायी व स्यायि अथवा कटुवाक्य ल्हायी
 चिन्ता मनै गुह्यसिनं मन स्वच्छ याना
 वै के च्वनी मखु मने वनि द्वेष ग्याना ॥४॥

गथे फुकै मखु लखं लख, तेज तेज्जं
 ब थें फुकै मखु तमं तम, द्वेष द्वेष
 प्रेमं पराजय जुया वनि द्वेष वादी
 सिद्धान्त भ्रान्ति मदु निश्चय श्वो अनादि ॥५॥

कालं यनी सकल की नर जीव जन्तु
 सान्सारिनं थुगु मस्यू अनिवार्य हेतु
 जुया सतर्क गुह्यस्यं थुगु मर्म सीकै
 शान्तिप्रभां कलह वैगु तुरुन्त यंकै ॥६॥

चितं सदां विषयमा जक ध्यान याना
 वश्ये तये मफुह्य इन्द्रिययात ख्याना
 जिह्वां मफू सम सुभोजन याय नित्य
 आलस्य दुर्वल जुया च्वनि सू असत्य,

भारं नास्वायि थुगु जीवन युद्ध भूमि
 नामी अतूल धनया जुलसां व स्वामी
 बायू प्रचण्ड वयि निर्वल वृक्ष वेगं
 लिना समूल यनि थें क्षितिमेरू-भागं ॥७॥

चित्तं सदां विषयया सुखयात वाना
 च्वनी सुनां थवगु इन्द्रियायत चीना
 सु सयमी जुयि दृढं रस भोजनादी
 श्रद्धालु वीर नरङ्गव अप्रमादी,

भारं अनेक छल छन्द वया विरुद्धे
 याःसां बुके कयिमखू व्यावहार युद्धे
 गर्व सहीत वल सां अनिलाभिमानो
 याये अवश्य मफु थें गिरियात हानी ॥८॥

यह्य प्रपञ्च विषय लिमकास्य चित्त
 इच्छा तथा जुयिह्य चिवर वस्त्र तीत
 यानाव तुच्छ जुयि संयम सत्ययात
 काषया वस्त्र तिय योग्य मजू वयात ॥९॥

ह्वया प्रपञ्च विषय मनयात पारो
 जुयी सु सद्गुण विभूषित देहधारी
 सत्कार याय फुह्य संयम सत्ययात
 व हे सुयोग्य जुल चीवर वस्त्र तीत ॥१०॥

मिथ्या खनी सहज सत्य सुनां निकाय !
 निसारयात गुह्यस्यं खनि सार हाय
 सीके फयी मखु सुधा सम सत्य उच्च
 इच्छादि व्यर्थपिनि किकर ज्वी द नीच ॥११॥
 सत्यैत सत्यगु धका गन बं हा सीकै
 मिथ्या तथानृत धका अन शीघ्र सीकै
 सत्यत्व मूल धन ब थन लाभ देकै
 स्वेच्छानुकूल अत्य जीवनयात भिकै ॥१२॥
 पलिचियेगु भवने बिपरीत याव
 ज्वया गथे वनि अन जल वृष्टि ज्वीव
 च थें बिवेक मदुगू मनया प्रबह
 कामादि भोग बिषये वनि शीघ्र आह ! ॥१३॥
 पलि चिना गन गृहे तयि साबधानं
 चर्पा ज्वयी मखु गथे अन नीर पौनं
 च थें बिवेक दतसा मनयात हानं
 थीफै मखू विषयया चिप वासनानं ॥१४॥
 हे भिक्षुपि गुह्य जनं खन कार्य यागी
 सन्ताप वं उभयसं अविराम कायी
 थःगू कुकूर्म खनि हा कन ताप छोयी
 अत्यन्त कष्ट मय दारुण दुख जूयी ॥१५॥

धर्म सहित थन ज्वी गुह्य सद् विचारी
 आनन्द दै उभय लोकस वैत भारी
 निक्खें अपूर्व सुख ज्वी थव कार्य सोया
 अत्यन्त सुद्धगु खना जुयि हर्ष जूया ॥१६॥

पापी जुया गुम्ह जनं थन पाप यायी
 चैतन्य देह दतले परित्ताप कायी
 सीना अले वनि थनं परलोक थेनी
 दुःखं लिना यनि तमं अन वैत जोनी ।

थःगू अले दुरित दूषित कार्ययागु
 वःगू खना कुफल चित्त उदास ज्वीगु
 वनाव पातक पथे अति दूर दूर
 अत्यन्त कष्ट हृदये जुयि वार वार ॥१७॥

सद्कार्य यायि गुह्यास्यं मन शुद्ध याना
 दैगू अवश्य थन ला सुख वैत नाना
 सिना वनी सुखि जुयी क्कन मेगु लोके
 निक्खें जुयी सुखि अले गन लाइ शोके

थःगू सुकर्म गुणया परिमाण भिगु
 स्वया उक्ति क्कन मने सुख लाभ दैगु
 थःगू गती गन थमं खनि धर्मयागु
 आनन्द ज्वी अतुल नित्यगु वैत साःगु ॥१८॥

भिक्षुं विवेक मतसे बहु ग्रन्थ नाना
 तःसां सदा सफल पुस्तक कण्ठयाना
 शास्त्रानुसार यदि कार्य मयात धाःसां
 वं याःगु व्यर्थ जुल भिक्षु उपाधि आश ।
 न्हापां दना द्वक ज्वना तृण माः वनीह्य
 कव्याह्य सा जक निना वनचाः हिलीह्य
 सापू समान जुल पण्डितता वयागु
 निर्बुद्धिया पद उकीं बिल वैत लोगु ॥१६॥
 व्वंसां सफू भति भती जक धर्मयागु
 थ्वीका उकिं खँ सकतां निख्य लोकयागुं
 चिन्ता मयाःह्य भति हे, जिगु छंगु भाव
 तोता छ्वया सकला राग व द्वेष मोह
 थय् थय् जुया च्वन धका फुक सत्य थूह्य
 आचार चाल सकतां उकियात जोह्य
 वं याइ सार्थक सदा थुगु भिक्षु भेष
 चीका छ्वयाव मनया मल चित्त क्लेश ॥२०॥

प्रवासी-पत्नीया बसन्त

प्यारा सहायक विना जि अनाथिनीनं
वैराग्य वैभब बिया अति दीन भावं
कीगु समाज विधिया कुरिती क्याव
बल्लं छवया शिशिरयात बिदा वियाव ॥१॥

आःला सखी ! बल भयानकगू वसन्त
गय्गय् जुया जुयि मस्यू थुकियागु अन्त,
मेमेगु थें ऋतु मखू थव वसन्त घैह्य
कदर्पया दल दक्वे सरदार मूह्य ॥२॥

उद्यान, ताल, तरु, काननया विधान
यायीह्य शाशक्त वहे जुल थौं नवीन
सिमा लतादि नव पल्लव पूर्ण याना
सो पीर व्यूगु बनया छवि कीत केना ॥३॥

वेली चमेलि म्वतिया तकुस्वां अजूस्वां
जोयी गुलाफ गुणकेशरि आदि मूस्वां
ह्वेका बिया उपवने किलि मीलि याना
सो सो सखी ! दुःख बिया हल नित्य नाना ॥४॥

पासी अमासि कमसी फल वृक्ष पति
 बुद्धोगुलि मधुरगु बल वास सिति,
 थुकी दके जिमी मने विरहग्नि छुबैगु
 सीका थव भेद सुरभि षडयंत्र गोगु ॥५॥

चवापू व खोपु गरमी बल नित्य नथा
 सौन्दर्य पूर्ण जुल पुस्कर नीर जाया,
 केना क्रिडा जल विचे जन हंसयागु
 संहार यात अति कोमल चित्त किगु ॥६॥

स्वांमा सिमा सिरिसिभति कम्प याना
 विस्तार नं पवन वैगु सुवास जोना
 मिथा समान जुल किगु शरिरयात
 आवलि मेल सखि ! सेवन याय गात ॥७॥

हाल अति मधुर तान कया विहङ्ग
 याना विदेह कुसुमाकरयात दङ्ग
 सन्यः नियुक्त जुल हा खग दुष्ट जाति
 संचूर्ण यायत प्रवासिनियागु छाति ॥८॥

कृष्णः प्रगाढ जुल कोकिलया शरिर
 कुह कुह रब वया अति हे मधुर,
 व हे रवं दन सैन्य अनङ्गराज
 वाकि तयी मखुत आः थन कीगु लाज ॥९॥

नाना प्रकार कुसुमे अलि लोभि जात
 हाला जुयी भूनुनुनू मधु पान यायत,
 थव कृत्य स्वेव लुमनी पतियागु प्रेम
 उँयी जुया वयि जिमु मन रामराम ॥१७॥

ज्वाला सहित हृदये विरहाग्नि छवैगु
 उकिसनं दिनकरं कन ताप बीगु
 निखे लिना हल रिपुं गन आः सुलेगु
 आशा दूगू मखुत निश्चय देहयागु ॥१८॥

तापं पिडां बिल सखि ! समयानुकूल
 जिला तये मफुत छुं शरिरे दुकूल,
 कीगु फजित थुलि हे स्वययात जाल
 याना खाया चवन रवि दिन आः विशाल ॥१९॥

वंशी सितार तमलादिक बाद्य थाना
 याना चवनी सखिपिसं रसरङ्ग नाना
 नेना जिगु तन छवयी विरहाग्नि च्याना
 सिना बने मन जुयी पुखुली कवव्वना ॥२०॥

न्हापा अहो गुलि मनोहर थो हवेली
 स्वामी विना जुल थउँ सुनसान खाली,
 एकाकिनी जुल सखि मुव नाप होने
 कोला छपा वरु जवना वनवास वने ॥२१॥

चित्रं सहित अति कोमल रक्त नील
 तिये जि मेल सखि सुन्दरगु दुकूल,
 स्यूचां छिना छजु पुनाः पति ध्यान याना
 गुँफाय वना बरु चवने जपमाला जोना ॥१५॥

न्हाय्क स्वया संत थुना पतियात केना
 शृगारनं वदन चन्द्र समान याना
 चवने दुगु मखुत हा थन स्वामि ह्वःना
 वैरागिनी जुया बरु परदेश बःना ॥१६॥

आकाशनं किरण निर्मलगु वियाव
 कन्दपंया रण थले मत थे जुयाव
 वैरि जुया वल निशाकर कीत भारि
 याये धका थव समान कलङ्क धारि ॥१७॥

सिना ततःकल्यक चूंदरिया पतासी
 नेयाव गा मिहिन रेसमया दिदेशी
 न्हाना तुती रजतया रव वःगु कल्ली
 थो थो मुना युवतिपि न्यतनागु गल्ली ॥१८॥

ध्वाना परस्पर हिला हिसिदेक लवाना
 शृङ्गारया नवलित्ता जनपिन्त केना
 वगू खने दत सखी दयकाव भोज
 कायेत स्वंगु वनया अद्वितीय भोज ॥१९॥

पुजा प्रसन्न मन नं अन देगु याना
 स्वादिष्ट सोमरस भिगु विशेष तोना
 ज्वीका कपोल यचुगू अति लाल लाल
 मानो कया अन हितै रतियागु चाल ॥२०॥

हाला वसन्त उपराग थन अनङ्ग
 प्याखं हुया रसिक वर्ग विचित्र ढङ्ग
 याना क्यनी सकलसित अनेगु स्वाङ्ग
 स्वया जुया युवतिपि अति दङ्ग दङ्ग ॥२१॥

गन्धर्व किन्नरपिसं मन मोद चाया
 हा मानतै वनक्रिडाय् गुलि अप्सराया
 व थे' तयी थन विलासिनियागु मान
 आनन्द वीत युवकं इमिगु समान ॥२२॥

मुना छखे प्रणयणी गण गोल गोल
 लाया वने मदनया घनघोर जाल
 क्यंकै अहो युवक योवनया विहारी
 धन्या इपि जुल धनुर्धर थे' शिकारी ॥२३॥

आनन्द वीगु गुलि दु उलि चीज-बीज
 हा फुक्क कीत जुल दारुण कष्ट साज
 पापी पती मदुगुलि मन सावधान
 याना च्वने मफुत हा करुनानिधान ॥२४॥

निद्रा रती महु सखी ! रजनी जि द्योसां,
 ह्तिने अवश्य महु होस बना जि जूसां,
 सीके मफू थुहु धका सखिपिन्त खंसां,
 आनन्द ज्वीफु बरू क्त सिना जि वंसा॥२५॥

रात्री बिचे छन्हु जिके धनलाभ याय्गु
 प्रस्ताव यात पतिनं परदेश छाय्गु
 “कायेमते जि अवला थन छेँचस चाना
 नापं बखे प्रिय!” धका गुलि बिन्ति याना॥२६॥

“पत्नी ज्वना पुरुष आःतक सुं विशेष
 वंगू महुनि प्रिय पूर्वजपि सँदेश,
 बाधा थुकी दनि कठोरगु जी समाज
 जिके महु थुमित छेदन याय्गु साज॥२७॥

उकि ज्वना मफु वने प्रिय छन्त साथ
 माफी पवने बरू थुकी जि जुना अनाथ,
 पिला खुला जक चवना धन फक्क मूना
 शीघ्रं वये प्रिय!” धका वन जित्ति याना॥२८॥

दं दं दया वन सखी ! परदेश काःगु
 आवेतलें महुनि छुं समाचार वेगु,
 पियाचवनी मखुत यौवन ला वनीन
 हा देव ह्य पति बिना जिगु जन्म फीना॥२९॥

तोता गृहे युवति नारि विदेश वंषि
 धिक्कार हे धनपिशाच वनीक धाःपि !
 हानी थुकिं जुल गुली वनिता समाजे
 सो सो अरे पुरुषपि ! नयपाल राजे॥३०॥

लाखां अधीर कुल-कामिनि भ्रष्ट यात
 लाखां सुधीरपिनि योदन नष्ट यात,
 अयूनं मयाः छद्मसिनं थुकियागु वास्ता
 धिक्कार हे धनि छिमी पशु तुल्य चेष्टा॥३१॥

शिक्षा विहीन अवला जनपिन्त ख्वेका
 हेमाल बासि नरया मनयात हेका
 याना अनेक छल बञ्चक दुष्ट चाल
 मुंका हया कनकं दौलत आदि माल॥३२॥

सन्तान शिक्षित पराक्रमि वीर ज्वीगु
 विद्या बिया जनपिनी उपकार याःगु
 धा धा सुनां दु अवलागण हीत ज्वीगु
 शिक्षालयादि दयका धन खर्च याःगु ?॥३३॥

मूर्खाधिराज गुरुया उपदेश नेना
 नाना निरर्थकगु तामस धर्म याना
 मोमो गुली धन फुका अभिमानि धायका
 जानी धका जुयि विपक्ष समाज ह्लीका॥३४॥

स्वादिष्ट मांस मद भोजन नित्य याना
निर्वोध सेवक बिचे जक गर्व केना
सन्सार छू, समय छू, धनया छुसार
याना मसो छहसितनं थुगु खेँ विचारा॥३५॥

शिक्षा सुधार मजुया समयानुकूल
सन्तानपि इमि लिपा पशु तुल्य जूल
बीफू उदाहरण जि थुकियागु माक्व
ऊनै उपासकपिनी प्रिय पुत्र धाक्व॥३६॥

निर्वोध बृद्ध जननं कटु वाक्य ह्लासां
स्वार्थी नराधमतस्यं अति कष्ट व्यूसां
स्यंका व शीघ्र थनया कुप्रथा पुलांगु
याना व्यु है युवक वर्ग ! सुधार न्हूगु॥३७॥

६७ साल भाद्र

शान्तिसंगीत

पासा ! सदा थन मजू दिन की समान,
मूर्ख कया जुयि मन धनयाभिमान ।
हा देह हे जुल विनश्वर सत्य सत्य,
ज्वीगू गथे विभव भंगुरता असत्य !॥१॥

स्थीरं तथा हृदय छगु कनास्व नेत्र
शिक्षा समूह जगया खनि यत्र तत्र
च्वंगू सुया दु थन स्थीर जुया अवस्था !
स्वोगू अखण्ड जुल थो जगते व्यबस्था॥२॥

थ्व विश्व वस्तु परिवर्तन-शील मित्र,
नाना चरित्र भवया जुयिगू विचित्र
सुखे दुने असुख गोप्य जुया च्वनीगू
दुखान्त ज्वी सुख निमन्त्रण मोक वैगू॥३॥

त्वाना सुया जुल सखे ! परिनाम भिगु
जानी लिसे कलह उत्तम त्याग याय्गु
याना सदा जु सकलें सम मित्र भाव
धात्थें अले जुयि मखू सुखया अभाव॥४॥

कवर्यागु अल्प गुणसां गिरि भाव भाःपा
 च्वनीह्य सन्त जननं तयि दिव्य छापा,
 देका सुनां वियि जने सुख श्री अशोक
 वं यायि स्वर्ग समता थुगु मर्त्य-लोक ॥५॥

ह्लिह्लि जुया च्वन खनेमदु आयु क्षीण
 पासा, उकीं जुयिमते अलछी विलीन
 कर्तव्य जो फुकि अरे मनमूढ ! माया
 पापे तया जक फुके मर्त्य दिव्य काया ॥६॥

छाय् भूतकालिक दुखे जक खेद याय्गु
 पासा, लिहाँ वयि मखू दिन काल कीगु
 या वर्तमान समये शुभ कार्य वःगु
 आलस्य नं मखु कन्हे जक याय धाय्गु ॥७॥

छवया सुनां हल बिया नरदेह छन्त
 पूजा मयाः लुमनका गबलें वयात,
 मत्तःजुया विषयया मद नित्य तोना
 छाय् आत्म शत्रु छ जुया पुरुषार्थ वाना ॥८॥

च्वनी अहो विमुख नित्य जुया छ धर्म
 वनी अवश्य दिन छंगु प्रमोद कर्म
 हा सौख्य भोग मखु जीवनयागु काम
 भोगी शरीर जुयि निश्चय रोम धाम ॥९॥

तोता सदा विषयया विष युक्त साना
 सन्सार हे थव कुटुम्ब समान याना
 निष्कामनां दुखिपिनी दुख नाशयायुगु
 सम्पूर्ण धर्म गुरुया उपदेश मूगु॥१०॥

बीगू गुली सहज मौखिक धर्म शिक्षा
 कायगु उली सुगम सन्तपिनीगु दिक्षा
 यायगु थव दुष्कर अती मनन समीक्षा
 याना स्वयां जक जुयी उकिया परीक्षा॥११॥

आपा जुया नृपतिपि वन शक्तिशाली
 बाकी छह्मं मतल ह्नां गुलि मृत्यु जाली,
 सामान्य की दुखिपिनी थन छू ठिकाना
 धर्म उकीं लिचिल्यगु मखु मित्र ग्याना॥१२॥

सेवा सभक्ति जनया अविराम यायगु
 सद्धर्मया पथ लिना जक नित्य ज्वीगु
 फक्वो थमं दुखिजने उपकार यायगु
 सिना अले यमपुरी भय मोक कायगु॥१३॥

हिंसा, आलस्य, इर्ष्या, कलह, अज, घृणा, फूट, चिन्ता, विषाद
 ज्बीमाः थोलोप व्याक्कं व्यसन, अघ, व्यथा, माह माया प्रमाद
 तोता क्रोधादि, यायमाः सकल जनपिसं धर्म स्वाधीन पान
 याना थौं योगवीरं बिमल विनयतां शान्ति-संगीत गान॥१४॥

८७ साल आश्विन

जीवन-हार

सुर सुन्दर यौवन पूर्ण मिसा,
नव रत्न थुनागु लुँयागु तिसा
मखु योगु जिला प्रिय, मेगु दनि
कविता जिगु जीवन-हार खनी । ने.सं. १०५५

फवसा

गेहया प्रेम नं पुत्रया स्नेह नं
सुन्दरी दार नं रत्न श्री हेम नं
पूर्णतां तोलता मोह जि देहया
शारदे शारदे! थौं छता फोंवया । ने.सं. १०५५

हृदयया सली

ज्वना करं कलश यौवन-मद्य जाःगु
प्वंका वहे रस म्हुत्वी उनमत्त ज्वीगु,
ध्व हे रसे ह्मिनु ह्मिनुं फुत हा जवानी
प्राणेश्वरी हृदययागु सली मजाःनि ।

फूगु मखू ऋतुवसन्त विवाह पक्ष
वने धका जुल छ मंमदु सां व थःछे
पासापिनी शरम, नूतन प्रेम जाःनि
प्राणेश्वरी हृदययागु सली मजाःनि । ने.सं. १०५६

विश्वन्तर

कीर्तिया लोभं मचा खाचा दान बिया
निर्दयी दुष्ट सम जुया ।
पापी जुय धुन लोकया दृष्टी
क्षमा पवने छंके प्यारी,
मोहया वसे लाना
विलाप छाये यांना ?
ज्ञानया मिखा कना सो—
माता, पिता प्रिय सुत, दारा
दिषयया जाल धका सीद्दि ।
तोता वने मानि थव देह सहितं,
ल्यनि मखु थन छुं बाकी,
त्यागया महत्व क्यने धुन रानी,
निश्चय धैर्य याय् माल,
सितिकं वनी मखु थुगु कीर्ति कीगु
लिपातकं ल्यनि थन बाकी ।

ने.सं. १०५६

चैतन्यगुरु अष्टक

आकाश, नार, पदनादिक सृष्टि कर्ता
ब्रह्मा छुकि जुल चतुरमुख वेदवक्ता,
चैतन्य वैक्य दुगुलि उगु शक्ति जाल,
उकि व चेतन महागुरु धाय माल ।

ब्रह्माण्ड वासि जन पालन नित्य यागु
देवतादि शत्रु सुरया अनगिन्त स्यागु
चैतन्य शक्ति दुगुलि हरि वीर जूल
उकि व चेतन महागुरु धाय माल ।

संहारकारि भवभारक पाप — पापी
कंलाश वासि घनघोर महा प्रतापी
चैतन्यतां जुल गुली शिव शक्तिवाल
उकि व चेतन महागुरु धाय माल ।

याना वने खुदत दुस्कर योग ध्यान
माला हया बिल सनातन बोधि ज्ञान,
श्री बुद्ध चेतन जुया सम ज्ञान काल,
उकि व चेतन महागुरु धाय माल ।

त्याका हिरण्यशिपुं सुर सैन्यपित
स्वर्गे वना सकल शासन थःगु यात
चैतन्यया प्रवलतां उगु सेखि बील
उकिं व चेतन महागुरु धाय माल ।

प्रह्लादनं थव पिता गुर्यागु शिक्षा
तोता व हे हरि धका पवन प्रेम-भिक्षा,
नृसिंह चेतन जुया अवतार काल
उकिं व चेतन महागुरु धाय माल

हा रक्त शेषक कुशासन ध्वंस यात
वाशिगटन्, तिकल, लेनिन, गान्धिपिन्त
चैतन्यतां जनसुधारक बुद्धि बील
उकिं व चेतन महागुरु धाय माल ।

यायेत दर्शन छको जक सिद्धिरत्न
याना जुया निशिदिनं महती प्रयत्न
चैतन्य न्यून जि जुया फुक व्यर्थ जूल
उकिं व चेतन महागुरु धाय माल ।

[थव कविता 'योग-सुधा' ह्यापांगु संस्करण (ने. सं. १०७१)
श्री सिद्धिरत्नजुं कष्ट यानातक्क जक तयाः त्रिकयातःगुली लिपा ब्यक्कलं
हे स्वर्गीय कवि योगवीर सिंहजुया हस्ताक्षर हे मालाः लुइका वियाः
'नेपाल' दँ २, त्थाः ५ (१०७४ हेमन्त) स प्रकाशित जुया च्वंगुलि थन
नल्लयथने खंगु छः । — मुंछ]

